

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 4/48

ք.Երևան

26 հունվարի 2024թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով ՀՀ ՊԵԿ Երևանի մաքսային սպասարկման կենտրոն-մաքսատուն, վարչության «Վարչական տույժ նշանակելու մասին» 05.12.2023թ. թիվ 05100010/05122023/00003215 որոշման դեմ ֆիզիկական անձ Անահիտ Ասոյանի դիմում-բողոքը՝

ՊԱՐԶԵՑ

1. Բողոքարկման առարկան, դիմում-բողոքով բերված փաստարկները և ներկայացված պահանջները

Ֆիզիկական անձ Անահիտ Ասոյանը հայտնում է, որ սույն թվականի հուլիսի 20-ին թիվ 05100022/200723/0024483 տարանցման հայտարարագրով ԱՄՆ-ից իր անունով ՀՀ է ներմուծվել ընդհանուր 1 տեղ 28,8կգ քաշով ծանրոց: Նշված ծանրոցի համար իր անունով 11.09.2023թ. ՀՀ ՊԵԿ Արևմտյան մաքսատուն-վարչությունում ներկայացվել է թիվ 05100011/110923/0047524 ապրանքների հայտարարագիրը, սակայն իր նկատմամբ 05.12.2023թ. ՀՀ ՊԵԿ Երևանի մաքսային սպասարկման կենտրոն-մաքսատուն, վարչությունում, համաձայն «Մաքսային կարգավորման մասին» ՀՀ օրենքի 304-րդ հոդվածի, կայացվել է «Վարչական տույժ նշանակելու մասին» թիվ 3215 որոշումն առ այն, որ սահմանված 4 ամսյա ժամկետում չեն ներկայացրել ապրանքների հայտարարագիր:

Ֆիզիկական անձ Անահիտ Ասոյանը խնդրում է վերանայել «Վարչական տույժ նշանակելու մասին» թիվ 3215 որոշումը ու վերացնել նշանակված 30000 ՀՀ դրամի չափով տուգանքը:

2. Դիմում-բողոքի քննության համար էական նշանակություն ունեցող փաստերը

ՀՀ ՊԵԿ Երևանի մաքսային սպասարկման կենտրոն-մաքսատուն, վարչության «Վարչական տույժ նշանակելու մասին» 05.12.2023թ. թիվ 05100010/05122023/00003215 որոշման մեջ մասնավորապես նշված է, որ 20.07.2023-ին թիվ 05100022/200723/0024483 տարանցման հայտարարագրով Բավրայի մաքսային կետ-բաժին անցակետով ՀՀ տարածք է ներմուծվել Անահիտ Ասոյանին պատկանող ապրանքներ (առաքանի՝ 7581430), ինչը՝ 22.07.2023 թվականին հանձնվել է մաքսային մարմինների ժամանակավոր պահպանությանը, սակայն մինչև ժամանակավոր պահպանության ժամկետի լրանալը ապրանքների վերաբերյալ մաքսային հայտարարագիրը մաքսային մարմնին չի ներկայացվել, ինչի առթիվ 24.11.2023թ.-ին

ՀՀ ՊԵԿ Երևանի մաքսային սպասարկման կենտրոն-մաքսատուն, վարչության բացթողնման բաժնի մաքսային տեսուչի կողմից մաքսային կանոնների խախտում կատարած անձ՝ Անահիտ Ասոյանի առնչությամբ կազմվել է մաքսային կանոնների խախտման վերաբերյալ արձանագրություն՝ մաքսային կարգավորման մասին ՀՀ օրենքի 304-րդ հոդվածի հատկանիշներով:

Գործի քննությունը՝ Անահիտ Ասոյանի մասնակցությամբ իրականացնելու համար ծանուցագիր է ուղարկվել Անահիտ Ասոյանի հաշվառման հասցեով, սակայն բացակայել է:

Գործի քննությամբ բացահայտվել է, որ 05100022/200723/0024483 տարանցման հայտարարագրով ՀՀ ներմուծված ապրանքների (առաքանի՝ 7581430) վերաբերյալ մաքսային հայտարարագիրը մաքսային մարմնին չի ներկայացվել, որով խախտվել է ԵԱՏՄ մաքսային օրենսգրքի 110-րդ հոդվածի 1-ին մասով սահմանված պահանջը:

Հիմք ընդունելով «Մաքսային կարգավորման մասին» ՀՀ օրենքի 304-րդ հոդվածը՝ որոշում է կայացվել Անահիտ Ասոյանի նկատմամբ նշանակել տուգանք՝ 30,000 ՀՀ դրամի չափով:

3. Բողոքարկման առարկային վերաբերվող իրավական կարգավորումներ և եզրահանգումներ

ԵԱՏՄ մաքսային օրենսգրքի 101-րդ հոդվածի 1-ին կետի համաձայն՝ ապրանքների ժամանակավոր պահպանման ժամկետը հաշվարկվում է ապրանքները ժամանակավոր պահպանման հանձնելու համար ներկայացված փաստաթղթերը մաքսային մարմնի կողմից գրանցվելու օրվան հաջորդող օրվանից և կազմում է 4 ամիս՝ բացառությամբ սույն Օրենսգրքի սույն հոդվածի 2-րդ կետում և 259-րդ հոդվածում նշված դեպքերի:

Նույն օրենսգրքի 110-րդ հոդվածի 1-ին կետի համաձայն՝ միության մաքսային տարածք ներմուծվող ապրանքների մասին մաքսային հայտարարագիրը ներկայացվում է մինչև ապրանքների ժամանակավոր պահպանման ժամկետի լրանալը կամ սույն Օրենսգրքով սահմանված այլ ժամկետում:

«Մաքսային կարգավորման մասին» Հայաստանի Հանրապետության օրենքի 301-րդ հոդվածի 1-ին մասի համաձայն՝ մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն:

Նույն հոդվածի 2-րդ մասի համաձայն՝ ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

«Մաքսային կարգավորման մասին» Հայաստանի Հանրապետության օրենքի 304-րդ հոդվածի համաձայն՝ սահմանված ժամկետում մաքսային մարմիններ Միության մաքսային

օրենսգրքով կամ սույն օրենքով սահմանված մաքսային հայտարարագրերը կամ պարտադիր ներկայացման ենթակա այլ մաքսային փաստաթղթերը չներկայացնելը՝ առաջացնում է տուգանք՝ ֆիզիկական անձանց համար՝ երեսուն հազար դրամի, իսկ պաշտոնատար անձանց համար՝ հիսուն հազար դրամի չափով:

Քննարկվող դեպքում Հանձնաժողովը հատկանշական է համարում այն հանգամանքը, որ 11.09.2023թ. ՀՀ ՊԵԿ Արևմտյան մաքսատուն-վարչությունում ներկայացվել է թիվ 05100011/110923/0047524 ապրանքների հայտարարագիրը, որը մերժվել է՝ խնդիրների առկայության պատճառով: Նշվածը նշանակում է, որ այնուամենայնիվ ներկայացված է եղել հայտարարագիր:

Ելնելով վերը նշված իրավանորմերի դրույթներից, հիմք ընդունելով սույն որոշման 2-րդ կետում բերված փաստական տվյալները և նախորդիվ կատարված վերլուծությունները՝ Հանձնաժողովը գտնում է, որ տվյալ պարագայում բացակայում է ֆիզիկական անձ Անահիտ Ասոյանի կատարած անօրինական գործողությունը կամ անգործությունը, որը կարող էր հանգեցնել «Մաքսային կարգավորման մասին» ՀՀ օրենքի 304-րդ հոդվածով սահմանված պատասխանատվության կիրառմանը, ուստի ՀՀ ՊԵԿ Երևանի մաքսային սպասարկման կենտրոն-մաքսատուն, վարչության «Վարչական տույժ նշանակելու մասին» 05.12.2023թ. թիվ 05100010/05122023/00003215 որոշման դեմ ֆիզիկական անձ Անահիտ Ասոյանի դիմում-բողոքը ենթակա է բավարարման:

4. Եզրափակիչ մաս


Ելնելով քննության արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը

ՈՐՈՇՈՒՄ Է՝

Ֆիզիկական անձ Անահիտ Ասոյանի դիմում-բողոքը բավարարել՝ բեկանել ՀՀ ՊԵԿ Երևանի մաքսային սպասարկման կենտրոն-մաքսատուն, վարչության «Վարչական տույժ նշանակելու մասին» 05.12.2023թ. թիվ 05100010/05122023/00003215 որոշումը:

Սույն որոշումն ուժի մեջ է մտնում իրազեկելուն հաջորդող օրվանից:

ՀԱՆՁՆԱԺՈՂՈՎԻ ՆԱԽԱԳԱՀ՝



ԿԱՐԵՆ ԹԱՄԱՋՅԱՆ